

E PROBLEMA SKONDÍ

“Si bo stimámi, probámi!” Ku frekuensia un yònkuman ta reta un mucha muhé ku e palabranan aki. Loke nan tin den nan kabes ta un prueba ku nan ta haña ta un demonstrashon sigur di stimashon. Kiko ta e prueba ei? Ta un regalo? Nò, kualke ken ku ta por duna un persona un regalo. Ta un sunchi? Esei sigur ta kuminsá bai den e direkshon deseá, ma tòg no ta konvensiente. Nos tur sa kiko ta den kabes di e yònkuman. Nos tur sa ku e siguiente frase di e yònkuman lo ta, “Hasi sèks ku mi.” Segun e (sigur loke e ke pa e mucha muhé kere), sèks ta un demonstrashon konvensiente di amor.

Sin duda, miles di bes kada dia rònt mundu, hende hòmber ta usa e argumento aki pa logra konvensé un mucha muhé pa drumi kun’è. Bes tras bes, hende muhé deseándo intimidat, ta someté na e argumento. Ma tur esaki ta kontribuí na un problema enorme.

Nos mundu awendia ta eksperensia un problema gigantesko di salubridat komo resultado di e mentalidat ei! E kantidat di kasonan di malesa kontagiá dor di relashon seksual ku un pèrsona infektá ta riba un eskala asina grandi ku nos ta haña nos obligá pa usa e palabra "epidémiko!" Enfermedatnan venérikos ta plamando for di kòntrol!

Ma bo no ta tende di e epidemia aki. E ta un epidemia silensioso. Un hende ku ta kontagiá un enfermedat venérikos tin bèrgwensa di konta otro hende. Hopi biaha ta e ku su dòkter so sa. Ma maske e epidemia aki por ta kubrí ku silensio, tòg e ta un epidemia real!

E KANTIDAT DI INFEKSHONAN TA ASTRONOMIKO

Nota algun sífra relashoná ku e epidemia aki. Na fin di 1992, Cable News Network (CNN) a reportá ku 43 mion merikano ta infektá ku enfermedatnan venérikos.^{T1^T} Na Merka so tin 12 mion kaso nobo di malesanan venérikos kada aña. Esei ta nifiká ku tin 32.000 kaso nobo di enfermedatnan venérikos kada dia. Un den kada sinku merikano entre 15 i 55 aña di edat lo ser infektá ku un malesa venérikos.^{T3^T} Sentronan pa Kontrol di Enfermedatnan na Merka ta prognostiká ku pronto un den kada kwater merikano lo ta infektá ku un enfermedat venérikos. Hóbennan bou di 25 aña di edat ta forma 63% di tur kaso di malesa venérikos.^{T4^T} Enfermedatnan venérikos ta infektá tres mion tineidjer kada aña na Merka.^{T5^T} Segun Organisashon Mundial di Salubridat, tin 365.000 kaso nobo di malesanan venérikos kada dia na mundu.^{T6^T}

E KANTIDAT DI ENFERMEDATNAN VENERIKO TA OUMENTA

Hóbennan awendia no ta realisá kiko ta pasando. Nan tin e impreshon ku sèmpèr e situashon ku enfermedatnan venérikos tabata manera e ta aktualmente. Nan ta wak e adultonan i ta pensa ku sèks deskabeyá no a hasi daño na nan tempu nan tabata hóben, p’esei nan tambe por gosa sèks bai

gol sin sufri e konsekuensianan. Ma nan no ta realisá ku tempu ku e adultonan dj'awendia tabata hóben, tabatin muchu ménos malesa venérikó, i ménos hende infektá pa enfermedatnan venérikó, i pues tabatin muchu ménos chéns di ser kontagiá.

Durante dékada sesenta, un "revolushon seksual" a tuma lugá. Sèks fuera di matrimonio tabata promové. "Si bo stima e pèrsona, dikon nò?" tabata e rasonamentu. E frekuensia di sèks fuera di matrimonio a oumentá. E kantidat di partner seksual a krese. Homoseksualidat i bi-seksualidat a bira aseptabel. Sèks deskabeyá a bira normal.

Ta importante pa nos bai bek den historia di enfermedatnan venérikó pa komprendé e situashon aktual mas mihó. Promé ku aña 1960, por bisa ku solamente dos malesa venérikó tabata konosí: gonorea i sífilis. Tabatin otronan, ma nan tabata kasi deskonosí i insignifikante. Ma kiku a sosodé komo resultado di e revolushon seksual di dékada sesenta? Na aña 1976 tabatin e promé reportáhe di infekshon di klamidia. E víro HIV ("human immunodeficiency virus") a ser deskubrí na aña 1981. Ma awor mas ku 2½ mion hende a muri di AIDS rònt mundu. Na aña 1982, e infekshon herpes a bira komun. Aktualmente mas ku 30 mion merikano ta infektá. E víro papiloma humano a bira komun na aña 1985. Na 1990, tiponan nobo di gonorea, resistente pa ku penisilin, a surgi rònt Merka. Durante dékada ochenta, embaraso den kanal di ovario ("eileiders") a oumenta 400%. Hopi di e kasonan aki tabata kousá pa enfermedatnan di inflamashon di pélvis ku ta resultá for di klamidia i gonorea. Maske tin remedi pa sífilis, pa 1992 e kasonan di e enfermedat aki a yega na un nivel mes haltu na Merka ku e tabata promé ku un kura a ser deskubrí kuarenta aña anterior. Pa 1993, malesanan di inflamashon di pélvis a infektá mas ku un mion muhé merikano kada aña, entre nan 20.000 tineidjer. Fuera di embaraso, esaki ta e motibu prinsipal ku hende muhé na Merka ta haña nan na hòspital. E malesa aki ta kousa doló di pélvis i infertilidat.

Awendia ta eksistí mas ku 30 enfermedat venérikó i hopi di nan ta plama fo'i kontrol. Ademas, ta bon pa kòrda ku ta pusibel pa un pèrsona kontagiá mas ku un malesa venérikó na e mésun tempu.

Pa mas information spesífiko tokante enfermedatnan transmit seksualmente, lesa e último kapitulo. E informashon den e kapitulo ei no ta reflehá e situashon awendia pasobra tur aña e sífranan ta kambia i tin atvansenan den tratamentu. Ma tòg, e lektor por haña idea di e seriedat di e epidémia ku ta eksistí ketu bai.